



PLAN DE APOIO A ENTIDADES DE ARRAIGO 2018

+INFO
www.coruna.gal/cultura
imce@coruna.es



Ayuntamiento de A Coruña
Concello da Coruña

 CORUÑA
PRÓXIMA

A cultura tradicional, así como outras expresións musicais asentadas na nosa cidade e habitualmente excluídas dos itinerarios de exhibición do contorno musical, demandan da administración pública unha cobertura da súa actividade para seguiren explorando na relación entre tradición, transmisión oral, participación social, historia e moitos outros conceptos precisos para entendermos a evolución cultural e musical da nosa contorna.

O apoio a entidades culturais de carácter fundamentalmente musical e de longa traxectoria na nosa cidade fai que o Instituto Municipal Coruña Espectáculos (a partir de agora, IMCE) estime necesario definir políticas de soporte e de sustento á súa actividade cotiá.

A cidade da Coruña conta cun nutrido número de entidades denominadas “de arraigo” que axudan activamente a dinamizar a programación cultural da cidade e dan saída á necesidade de colectivos non profesionais de gozaren da música como opción de lecer activo, formativo e de xeito continuado.

Co obxecto de atender ás necesidades das ditas “entidades con arraigo”, así como facilitar a organización e planificación cultural do IMCE, este publica a presente convocatoria de apoio á nosa cultura máis tradicional e enraizada.

A | OBXECTO E FINALIDADE DA CONVOCATORIA

1. É obxecto do presente texto a convocatoria pública a “entidades con arraigo”, constituídas legalmente e radicadas na cidade da Coruña, para a súa promoción a través da súa actividade artística e escénica.
2. Entendemos como “entidades con arraigo” aquelas entidades musicais de carácter asociativo e sen ánimo de lucro que desenvolven a súa actividade cultural na nosa cidade con estabilidade e que teñen nela un grao de implementación social representativo.
3. Non serán aceptadas entidades que realicen actividades que non se orienten á cidadanía en xeral. Ademais, terán que ser realizadas en locais ou espazos accesibles e terán que ser obrigatoriamente difundidas (en calquera soporte dirixido á poboación en xeral) nalgunha das dúas linguas oficiais, preferentemente en galego. Do mesmo xeito, deberán garantir un uso non sexista da linguaxe e da imaxe.
4. As entidades deberán devolver á cidadanía o froito do seu traballo artístico (en forma de actuacións musicais) sendo consensuado este co IMCE, a través da súa programación cultural habitual.

B | ENTIDADES PARTICIPANTES

1. Serán incluídas nesta convocatoria entidades musicais con arraigo que teñan o seu domicilio na cidade da Coruña, e que se encontren legalmente constituídas e rexistradas no REMAC (Rexistro Municipal de Asociacións da Coruña), na data en que remate o prazo de presentación de proxectos.
2. O ámbito de actuación das entidades participantes presentadas será o termo municipal da Coruña.



C | DOCUMENTACIÓN PARA ACHEGAR A ASOCIACIÓN

A asociación deberá presentar a proposta no rexistro oficial do IMCE (Avda. da Mariña, 18), xunto coa documentación seguinte:

1. Estatutos polos que se rexe a asociación e NIF (fotocopia compulsada).
2. Certificación acreditativa dos cargos representativos e do domicilio social.
3. Fotocopia compulsada do NIF da persoa representante legal da entidade.
4. Memoria da entidade que conteña, cando menos, os seguintes apartados:
 - Traxectoria da entidade.
 - Actividades desenvolvidas pola entidade.
 - Persoas destinatarias da actividade da entidade.
 - Caché por actuación individual.

D | PROCEDEMENTO DA INCLUSIÓN DOS PROXECTOS NO PROGRAMA

1. A inclusión das entidades que son obxecto desta convocatoria efectuarase en réxime de concorrencia competitiva.
2. A decisión sobre as entidades para incluír no Plan de apoio a entidades con arraigo realizarase mediante a comparación das solicitudes presentadas co fin de establecer unha prelación entre elas, de acordo cos criterios sinalados no apartado denominado "criterios de valoración". Serán incluídas as entidades que obtivesen a puntuación mínima requirida sen pasar, en ningún caso, do importe da dotación orzamentaria fixada nas bases específicas da convocatoria.
3. Os proxectos presentados serán avaliados por unha mesa que nomeará o concelleiro delegado de Culturas, Deportes e Coñecemento. A mesa estará composta polas persoas seguintes:
 - o concelleiro de Culturas ou persoa en quen delegar (con voz pero sen voto)
 - unha persoa funcionaria municipal vinculada á Área de Culturas que exercerá de secretaria.
 - 3 representantes do tecido asociativo cultural da cidade.

E | PRAZO E LUGAR DE PRESENTACIÓN DOS PROXECTOS

1. O prazo de presentación dos proxectos ou actividades será do día 4 de abril ao 24 de abril de 2018.
2. O lugar de presentación das propostas será o Rexistro do IMCE (Avda. da Mariña, 18. CP 15003, A Coruña).

F | PRAZO DE RESOLUCIÓN

O prazo de resolución das solicitudes será, como máximo, de tres semanas a partir da finalización do período de presentación de ideas ou proxectos.

G | RECURSOS ECONÓMICOS

1. Os proxectos incluídos na presente convocatoria serán imputados ao crédito orzamentario da partida 334/227.99 do orzamento do exercicio 2018 do IMCE. A dotación máxima para o programa será de 100.000 €.

2. A contía máxima para achegar por cada entidade será de 8.000 euros, impostos incluídos, que se pagarán sempre de xeito posterior a cada unha das actuacións realizadas e tras a presentación das correspondentes facturas.

H | CRITERIOS DE VALORACIÓN

Os criterios de valoración das entidades que se incluírán no Plan de apoio a entidades con arraigo serán os seguintes:

1. Vinculación da entidade ao ámbito da música, do baile e da cultural tradicional galega: ata 15 puntos.
2. Vinculación da entidade a outros ámbitos da música ou baile: ata 10 puntos
3. Número de persoas que conforman de xeito estable a entidade: ata 20 puntos, de acordo co seguinte baremo:
 - a) de 5 a 10 persoas: 5 puntos.
 - b) de 11 a 25 persoas: 10 puntos.
 - c) de 26 a 50 persoas: 15 puntos.
 - d) mais de 50 persoas: 20 puntos.
4. Antigüidade da entidade no Rexistro Municipal de Asociacións (REMAC): ata 5 puntos.
 - a) Máis de 2 anos: 5 puntos.
 - b) Menos de 2 anos: 0 puntos.
5. Traxectoria, continuidade e proxección social da entidade: ata 10 puntos.
6. Número de actividades ou actuacións realizadas pola entidade fóra do marco de actividade do Concello da Coruña nos últimos 2 anos: ata 15 puntos, de acordo co seguinte baremo:
 - a) de 3 a 10 actividades ou actuacións: 5 puntos.
 - b) de 11 a 20 actividades ou actuacións: 10 puntos.
 - c) mais de 20 actividades ou actuacións: 15 puntos.
7. Actividades complementarias (formativas, culturais, pedagóxicas etc.) realizadas pola entidade nos últimos 2 anos: ata 20 puntos, de acordo co seguinte baremo:
 - a) de 5 a 10 actividades: 5 puntos.
 - b) de 11 a 25 actividades: 10 puntos.
 - c) de 26 a 50 actividades: 15 puntos.
 - d) mais de 50 actividades: 20 puntos.
8. Emprego da lingua galega no desenvolvemento da súa actividade: 10 puntos.

I | OBRIGAS DA ENTIDADE

1. Acreditar ante o IMCE a realización da actividade, así como o cumprimento dos requisitos e condicións que determinen a súa inclusión no Plan de apoio a entidades con arraigo.
2. Realizar toda a publicidade das actividades nas dúas linguas oficiais, preferentemente en galego.
3. Facer mención expresa da colaboración do IMCE en todos os soportes de comunicación empregados.